

միջով: Այդ մշուշի միջով նկարուում էին հեռաւոր լեռները իրանց սպիտակափամ գագաթներով, այդ մշուշի միջով երեւում էր Վանայ ծովակը իր գեղագրական եզերքով, այդ մշուշի միջով նշմարուում էր ջրային հսկայ լողորդը, որը, իբրեւ մարմնացած առաջադիմութիւն, սլանում էր արա՛գ եւ արա՛գ, թողնելով ծովի խաղաղ մակերեւոյթի վրայ մի արծաթափայլ շաւիղ, իսկ օդի մէջ՝ ծխային երկար ժապաւեն:

Ոստանից ոչ այնքան հեռու գտնուում էր Ռազմիրան գիւղը: Այդ գիւղը իւր գեղեցիկ դիրքով ամենահին ժամանակներում Ռշտունի իշխանների գրօսավայրն էր, իսկ յետոյ Արծրունի իշխանների ամառանոցը դարձաւ: Բայց այժմ նրա մի կողմում, կանաչագարդ բարձրաւանդակի վրայ, կանգնած էր մի սիրուն, քարաշէն տուն: Նրա մի ճակատը նայում էր դէպի կապուտակ ծովը, իսկ միւս ճակատը՝ դէպի մի գեղեցիկ պարտեզ, որ տան առջեւից տարածուում էր դէպի ներքեւ եւ լայն, ծառագարդ թումբերով աստիճան առ աստիճան իջնում էր մինչեւ ձորը: Պարտեզում, այգեպանի սուր դանակը ձեռին, աշխատում էր մի մարդ: Տարիների ալիքները դեռ նոր էին սկսել արծաթագրել նրա գլխի սեւ մազերը: Իսկ թուփ դեմքի վրայ դեռեւս պահպանուել էր երիտասարդական աշխոյժը: Նա զգուշութեամբ ճեղքում էր մատաղ տունկերի կեղեւը եւ, ճեղքածքի մէջ անց կացնելով նորաբողբոջ շիւղեր, կապում էր փափուկ թելով: Նրա մօտ կանգնած էր մի փոքրիկ աղջիկ, գարնանային թեթեւ հագուստով եւ յարդեայ մեծ գլխարկով, որի լայն եզերքը հովանիի նման հասնում էին մինչեւ ուսերը: Նա ձեռքում բռնած ուներ ջրով լի թիթեղեայ մի թաս, որի մէջ լողում էին դալար բողբոջներ: Առաւօտեան զով օդը պայծառ-վարդագոյն երանգով ներկել էր այդ գեղեցիկ հրեշտակի լիքը թշերը, որ կապած էին սպիտակ թաշկինակով: Բայց այդ չէր արգելում նրան իր անվերջ շատախօսութեամբ անելի խանգարել հօրը, քան թէ օգնել նրան:

– Դրան ասում են պատուհա՞ս, հայրիկ:

– Պատուաստ, – ուղղեց հայրը: – Դու ե՞րբ պետք է սովորես այդ բառը, Աշխէն:

– Սովորեցայ, հայրիկ, պակուտաս, այդպէս չէ՞:

– Զիմա անելի փչացրիր:

– Ի՞նչ անեմ, լեզուս չէ բռնում:

– Մինչեւ այդ բառը ուղիղ չարտասանես, մայրիկին կասեմ, որ նախաճաշիկի ժամանակ քեզ քաղցր չտայ: